

alzo predicatoros werden, die man gar uffte alhie zu Leipczick auss andirn namhaftigen steten auch universiteten suchet unnd begeret, sundirlich doctores theologie, licenciatos, auch alleyne in derselben facultet baccalaureos, wie gar neulich ufft gescheen, sundirlich von Halle im tall, welche stad pranget mit den walen, welches diesser universitet nicht  
5 eyn kleyn ruff ist.

Entlich g. h. bedenckt die nation, das iss zere gut sey, das keyn magister adir doctor, zo her wes nawis gemacht hat, dasselbige edirnn lessen adir scolaribus communi- ciren sall, iss sey denn von derselben facultet dorinne her schreibet wol ubirlessen, zu- gelassen unnd approbiret, wenn dodurch kommet diese adir andir universitet leichtlich  
10 in eynen schimpf, schaden unnd bösse nachsagen wie itzunt vorhanden, das got von uns gnediglichen abewende. Gnediger herre, unußere studenten werden nicht stille stehen, sunder die privilegia wollen hören; derhalben wêr is gut, das dieselben ehnn geleißenn wurden alhie uff dem sloße vor aiern g.; in collegio ist nymant sicher, auch haben sie nicht raum dorinne. G. h. vor allen dingen ist not, das eyn erbar rad die fremden  
15 studenten die alhie nicht ingeschriben anneme unnd setze wo ehn dieselben werdenn angegeben, wenn disse vorfurn die unußernn wie itzunt gescheen.

Gnediger furst unnd herre. Diesse gebrechenn gebet nacio Polonorum aiern f. g. demutiglich unnd im besten zu irkennen bittende, aier f. g. wolle alzo dorinn sehenn, das wir hinfurder großirn frid, rue unnd sicherung mochten  
20 haben, welches ann aier f. g. rad, hulff unnd beystant zu fordirst gotes nicht gescheen kan. Das wil natio, magistri unnd doctores umb dieselb aier f. g. undirteniglich vordynen, auch got vleissig umb gesuntheit unnd langes leben bitende seyn. Will sich natio hybey gantz gote unnd aier f. g. ent- pholen haben.

25 Natio Polonorum, capellann unnd gantz willige dyner mit undirtenikeit.

## 235.

*Bericht der vier Deputirten vom Rathe der Artistenfakultät an Herzog Georg, worin verschiedene Beschwerden geführt werden, nämlich den Rang der philosophischen Vorlesungen, Aufnahme der jungen  
30 Magister in die Fakultät, Kleidung und Betragen derselben sowie der Studenten und andere Uebelstände betreffend.* [Zwischen 1502 und 1537.]

*Hdschr.: Or. Pap. Hauptstaatsarchiv Dresden, Universität, Raths und andere Händel 1367—1537 loc. 10532 fol. 426—431. — Von dem aufgedr. Siegel sind nur noch wenige Reste vorhanden.*

Durchlaucher, hochgeborner furste unde herr. Unßere | gantz willige unde  
35 undertenige dinste seint e. f. g. | allezeit zcuvern. Gnediger herre. Wir haben kurtz- lich | noch gelegener, gegebenner zzeit etzliche artickel unde puncta begriffen, bittennnd gantz demuttig e. f. g. wolle sie genediglich betrachten unde gedeye unde zcunehmen unser facultet artium zcu fordern behulfflich sein; das wolle wir umb dieselbige e. f. g. stets beflissen sein underteniglich zcu vordinen.